

समै – 12:25 hrs.

LG-Terrorism

उपराज्यपाल मनोज सिन्हा होरें जम्मू-कश्मीर च आतंकवाद करी प्रभावित परौआरें गी न्याऽ दोआने दी अपनी बचनबद्धता गी फी पक्का कीता। एह गल्ल उनें छत्तीसिंह पोरा शहीद सिंह वेलफेयर आर्गनाइजेशन दे प्रतिनिधिमंडल कन्नै मलाटी करदे होई आकखी। 20 मार्च 2000 गी पाकिस्तान प्रायोजित आतंकवादिएं अनंतनाग दे छत्तीसिंगपोरा च 35 सिक्खें दा कत्लेआम करी दिता हा। प्रतिनिधिमंडल नै उस घटना दी परतिए जांच करने दी मंग कीती ऐ। उपराज्यपाल होरें भरोसा दोआया जे प्रभावित परौआरें कन्नै पक्क गै न्याऽ होग। इस मामले च जांच कीती जाग ते इसी पूरी संवेदनशीलता कन्नै दिक्खेआ जाग ते इसी तरजीह दिती जाग। उनें भरोसा दोआया जे योग्य परौआरें दे मिम्बरें गी नियुक्ति पत्र ते स्वयं रोजगार आस्तै माली इमदाद दिती जाग।

<><><><><><>

IAF-Rescue

भारतीय वायु सेना नै जम्मू-कश्मीर च ल्हास-पस्सिएं करी प्रभावित इलाकें च मानवता दे आधार पर इक व्यापक अभियान चलाया। इक सोशल मीडिया अपडेट च, वायु सेना दी पच्छमी वायु कमान ने दस्सेआ ऐ जे जम्मू-कश्मीर च उधमपुर दे पस्सिएं कन्नै प्रभावत इलाकें च, उन्नै 5.9 टन खाने-पीने दा समेयान ब्हाई ज्हाजै राहें पुजाइयै इक साहसिक

मिशन गी अंजाम दिता। हिमाचल प्रदेश च, तौले ते जोखम भरोचे अभियानें दे कारण 17एं घेंटें दे असरदार जतने नै 540 लोकें गी बचाया ते उत्थुआं कड्ढेआ गेआ। इ'नें मिशनें दी कामयाबी यकीनी करने आस्तै चार हेलीकाप्टर ते 35एं दे चालक दल ने लगातार संचालन कीता। उधमपुर बुरी चाल्ली प्रभावत होआ ऐ, जेह् डा भारी बरखा, चानचक्क हाड़ ते पस्सिएं दा सामना करा'रदा ऐ। भारती सैना, राश्ट्री आपदा मोचन बल (एनडीआरएफ) ते राज्य आपदा मोचन बल (एस.डी.आर.एफ) ने भारी बरखा दे कारण जम्मू-कश्मीर दे प्रभावत इलाकें च बड्डे पैमाने पर राहत अभियान चलाए दे न। अधिकारियें जकीन दोआया ऐ जे राहत जतन जारी रौहडन।

<><><><><><>

Railway-Train Services

उत्तर रेलवे आसेआ श्री माता वैष्णो देवी कटड़ा स्टेशन ते संगलदान बश्कार 5 दिनें लेई कल्लै थमां रेल सेवा चलाई जाग। एहदे कन्नै बरखें ते चानचक्क हाड़ें करी रियासी ते रामबन च फसे दे यात्रिएं गी स्हूलत होग। एहदे कन्नै महत्वपूर्ण रस्ते लेई राबता उपलब्ध होग। इनें रेल सेवाएं दे समें दी जानकारी उत्तर रेलवे दे आधिकारिक सोशल मीडिया हैंडल्स थमां लैती जाई सकदी ऐ।

<><><><><><>

JMC-Commissioner

जम्मू-कश्मीर च होई दी भारी बरखें ते आए दे चान-चक्क हाईं मगरा जम्मू म्युनिसिपल कापॅरिशन दे कमिशनर डॉ. देवांश यादव होरें जम्मू दे लोकें गी अपील कीती ऐ जे ओह सतर्क ते सौहगे रौहना। उनें आखेआ ऐ जे हाईं करी प्रभावित इलाकें च पानी करी पैदा होइ सकने आहली बमारिएं दा खदशा बने दा रौहंदा ऐ ते इंदे थमां बचाs लेई लोइचदे हीले करना लोकें दी सेहत लेई अत लाजमी न।

<><><><><><>

Silat-Championship

त्री एशियाई जूनिअर पेनकाक सिलाट चैंपियनशिप 25 कोला लेइयै 30 सितंबर तोड़ी श्रीनगर च आयोजित कीती जा'रदी ऐ जेदा सरिस्ता भारती पेनकाक सिलाट फेडरेशन आसेआ पेनकाक सिलाट फेडरेशन ऑफ एशिया पर सिलाट, खेड मंत्रालय ते जम्मू-कश्मीर खेड परिसर दे सहयोग कन्नै कीता जा करदा ऐ। इस चैंपियनशिप च पूरे एशिया थमां इस मार्शल आर्ट दे खडारी हिस्सा लैने गितै आवा करदे न। इस आयोजन च बक्ख-बक्ख श्रेणिएं ते वर्गे च मकाबले होडन जिंदे च टैडिंग, तुन्गल्ल, गांदा ते रेगु वगैरा शामिल न जिंदे च कुड़िएं ते जागतें दे बक्ख-बक्ख मकाबले होडन। इस चैंपियनशिप दा मकसद परानिएं ते रिवायती मार्शल आर्ट्स गी बढ़ावा देना ऐ ते नोजवानें च खेडें गी लेइयै दिलचस्पी बधाना बी।

<><><><><><>

Weather-Traffic

मौसम विभाग नै औंदी 12 सितम्बर तोहड़ी जम्मू-कश्मीर च रूकी-रुकियै बरखा बरने ते गरज-चमक दी पेशगोई कीती ऐ। उ'आं मौसम विभाग नै इब्बी साफ करी दिता ऐ जे इस अवधि दरान मौसम च कोई बड़्डी तब्दीली दिक्खने गी नेई लब्भोग। मौसम विभाग मूजब, अज्ज ते कल केईं थाहें पर हौली बरखा बरी सकदी ऐ। जम्मू खिते दे किश जिलें च चिरें रातीं जां बड़्डलै सवेला बी दरम्याने दर्जे दी बरखा बरने दे असार न। औंदी 9 शा 12 सितम्बर मझाटै प्रदेश दिएं टार्मी-टार्मीं थाहें पर बरखा बरी सकदी ऐ। तोआई मुगल रोड ते श्रीनगर-सोनामर्ग-गुमरी सिड़कै पर छड़ी हौली मोटर गड़्डिं गी आओजाई दी खुल्ल दिती गेदी ऐ जिसलै के जम्मू-श्रीनगर राश्ट्री जरनैली सिड़क अजें बी बंद ऐ। राश्ट्री जरनैली सिड़कें सरबंधी भारती प्राधिकरण नै अपने अमले ते मशीनें गी बरोबर कम्मै पर लाए दा ऐ तांजे सिड़कै पर गड़्डिं दी आओजाई तौले शा तौले ब्हाल कीती जाई सकै। लोकें गी सलाह दिती गेई ऐ जे ओह सिड़कै गी ब्हाल करने दा कम्म मुकम्मल नेईं होने तोहड़ी इस सिड़कै पर सफर नेईं करन।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते

मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौंहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संज्ञा 6 बजे कोला पैहले- पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>